


日本漢文學百家集

王焱 編

332



北京燕山出版社



王焱 主編

日本漢文學百家集
332



北京燕山出版社

第三三二册

對竹齋詩集 一卷 山本章夫著 明治四十年……………一

習齋先生遺稿 一卷 藤田習齋著 大正十二年……………一二三

求志洞遺稿 文一卷 詩一卷 小林虎著 明治二十七年……………一九一

對竹齋詩集

全

序

先生經術之士。詞章之末技。固非所長也。雖然。內所蘊藉。遂溢於外。稱其咨嗟咏歎之聲。不敢以粉飾爲巧。唯以抒情達意爲主。故句法聲律。雖或有可指議者。其可以規。可以箴。可以興者。自有與尋常詩人不同者也。夫詩者。性情之所發。不可得蔽也。欲觀其人。宜先觀其詩也。先生捐館已三年。其容之溫。其音之和。不可復接也。今而可髣髴其面目於萬一者。其唯詩乎。余之蒐先生之詩。由思慕之情。欲禁而不能禁。

也。明治丙午秋十月。菊花初開處。門人眞下敬之謹識。

對竹齋詩集

山本章夫先生著 門人眞下敬之編

五言古

見蜘蛛結網有感

晚來無一事。下階望簷楹。簷楹有蛛子。雖微智太靈。
左右審計度。高下布置平。網張紀亦整。經疎緯甚精。
唯見纖纖手。曾無札札聲。幸不爲人毆。辛勤工始成。
奈何蚊與蚋。終夕不來撻。忽遇崩沙過。翩然敗汝棚。
網破不復補。機斷難再營。微雨時一過。百顆露珠明。

得珠非吾食。枵然命乃罄。吾本圭竇士。何曾有餘贏。
圖書久埋首。恃此欲治生。自朝至日昃。孜孜不知停。
見夫蜘蛛困。奈何不魂驚。因較彼我實。是非似可爭。
彼唯貪口腹。殘殺罪貫盈。我自性仁義。愛育心所銘。
多福或不及。應免禍殃縈。欲把問蒼昊。蒼昊只冥冥。

秋蝶

秋蝶有意否。故來幽閒地。幽地百千花。何枝尤可倚。
欲集却遽散。已去還忽至。不飲復不餐。如何爾心醉。
吾見秋後蟲。一一皆有累。馬蜩聲如嘖。蛸螻似有對。

絡繹覺徒譁。蟋蟀多哀思。就中金鐘兒。尤婉畏籠致。
善哉勾鼻君。隨處弄弱翅。默默復如如。亦不違其志。
隨知浮競徒。不如靜者熹。

柿實歎。思先妣也。柿實先妣所偏嗜。

滴滴還滴滴。秋雨撲荊扉。滴滴還滴滴。柿實辭高枝。
滴滴還滴滴。吾泪沾裳衣。秋雨一何苦。吾泪一何滋。
吾母不可見。持此欲贈誰。

認晴

認晴訂遊期。期至多陰雨。乘雨訂遊期。期至得和煦。

一雨又一晴。一甘又一苦。百事無不然。且須忍出股。

述懷

去年辭病去。遙望舊廬歸。雖苦衣糧乏。且欣道義肥。
雲鴻便逸起。巢燕喜相依。一片求仁志。世自識者稀。

吾廬

吾廬雖爾小。樂比九層臺。有酒輒堪醉。栽花亦解開。
朝蛩階下瑟。午鼯枕頭雷。只愛堪高臥。未求榮寵來。

貧居

雖無妻兒奉。數口偶相隨。晨起灑掃罷。攢首啜薄糜。

有魚同汝飲。有勞吾不辭。惡衣復惡食。相顧共怡怡。
何以乃能爾。賴心無偏私。從知天下事。亦唯以此推。

詠隣園芭蕉。六月四日夜風雨。

隔牆誰家園。芭蕉翠奕奕。玉質無滕瑕。蒼然蔽四壁。
把盃時一對。嚴顏儘可釋。誰圖昨夜風。吹雨利如戟。
可憐綠雲影。十裂復百坼。宛似鬪敗鷄。昂然鍛羽翮。
主人寤嘆惜。欲理竟無策。吾言何用悲。衰榮互變革。
自古柔制剛。先失後必獲。今朝天猶曩。未可期霽關。
暴風若重至。衆木均辟易。縱有十圍大。摧折將無迹。

是時芭蕉樹。柔心不索莫。隨作尺素抽。漸看寶蠶碩。
須臾直遮日。依舊色澤澤。寄言椿兼樗。偏彊果何益。

閒臥

閒臥北窓下。世事經思寡。如聞海外邦。方盛用兵馬。
吾無官守縈。蠻觸笑么麼。時展書一卷。或把酒一罍。
百度未整間。如此過亦可。

言志

蛾眉非不欲。踰牆惡違禮。重糈非不慕。視之如脫躡。
墨守古人道。心知長相俟。肥馬與輕裘。內顧便可泚。

只爲道不明。素志動瓦解。願厲松柏節。莫有辱遺體。

大道

大道直如髮。無人解緣之。田塍爲可逕。巖角言可馳。
與此辯無益。不辯心弗怡。所以藤俊成。欲住山之厓。

壬午元旦

微雪壓浮塵。朝曦正表春。兒女聚嬉戲。不要衣袂新。
團欒傳椒酒。有憶昔侍親。因記先人語。只應安清貧。
敦厚卽家學。撲素書諸紳。嚶嚶守吾志。所願古之人。

戊子元旦

舉世皆春服。吾獨臥茅廬。臥廬亦自可。日夜讀吾書。
憶昔益稷契。德裕才有餘。揖讓廟堂上。濟濟曳長裾。
書中相尙友。恍如遊華胥。官報束已久。名利心轉踈。
怪夫躁進者。讀書爲重糈。哀哉益生活。徃徃陷覆車。
及其未取禍。何不賦歸歟。

望月

望月還問月。月色無古今。斯是聖人道。安得有古今。

七言古

竹實行

嘉永庚戌之夏。近畿小竹盡生花結實。或言
凶年之兆。予爲作竹實行。

竹實羅生水之隈。鳳兮鳳兮何不來。四月棟花雨初
晴。大麥小麥次第黃。如何百穀益騰貴。孤兒寡婦窘
糗糧。天降嘉種爲生靈。鳳兮鳳兮何得嘗。布囊筠籃
雙芒屨。相遇盡言向山澤。自朝至暮知幾時。轉運已
欲要車脚。炒之爲麩蒸爲糕。麩條剪出可薦客。吾聞
之而久嘆嗟。命童治裝且具茶。杖拂彌陀峯頭露。衣
襯嵯峨山外霞。峯頭山外連陵阜。穰穰恰如望隴畝。

取之無禁不耕獲。寡婦之利所未有。爭投草莽縱采
掇。蛛網頻觸蚋頻齧。笠摧衣穿不足言。荊棘鉤脚屢
見血。倦來村店貰濁醪。一杯澆胃未酬勞。呼取村夫
網巨鯽。阿媪爲吾揮霜刀。半下搯鼓半供膾。匏樽傾
盡意始豪。嗟乎竹實非佳味。收之僅足充飢胃。如何
先生傾囊盡。所得不能償所費。君不見青砥左衛門
橋下錢。十錢撈得萬錢捐。君子唯惡天物棄。利害損
益非所銓。剖毫分釐豈如市井賈豎然。

霜曉